

Tge munta Macron per l'Europa?

Il president nov da la Frantscha

DA GUIU SOBIELA-CAANITZ

■ Ils 7 da matg han votantas e votants da la Frantscha tschernì il president che duai reger e represchentar il pajais durant tschintg onns. 20,7 milliuns (66,1%) han vuschà per l'antier minister Emmanuel Macron (*1977), naschì ad Amiens, citad da la Frantscha dal nord, sco figl d'in medi e d'ina doctoresa. Macron ha lavurà tar la banca Rothschild e lura per la presidenza da la republica. Da 2014 a 2016 è l'istà minister da l'economia. Il 2016 ha l' fundà «En Marche!» (EM), «association pour le renouvellement de la vie politique» (1) che sa definischa «progressista, sociala, liberala e favuraivla a l'integrasiun europeica». Il november è Macron sa declerà candidat per la presidenza da la republica. Tar l'emprim scrutini (avrigl 2017) ha l' survegnì 8,6 milliuns vuschs. Tar il segund è vegnì tier tgi che na leva betg l'elecziun da la candidada dal «Front national» (FN). Pervi da las abstenziuns han mo 43,63% da las persunas cun dretg d'eleger vuschà per Macron. Ses triumf è pia relativ; quai sa el.

L'essaist franzos Pascal Bruckner scriva: «Sia speranza instancabla, sia refusa da la decadenza, sia energia positiva stattan a travers dal spiert malcontent che dumogna il pajais» («NZZ», 12 da matg 2017, p. 37). «Macron è quel striun che po salvar l'Europa, che ha fermà ils extremists da dretga, che dat puspè speranza e schlantsch als Europeans suenter in onn snuaivel, suenter 'Brexit', Trump ed ils populists» (2).

In pensum fitg grev

«Le Courrier» (Genevra) e «La Liberté» (Friburg) dals 8 da matg rapportan: «En ses emprim discurs ha Macron declerà ch'el chapeschia 'mintga burgaisa e burgais', era tgi che haja exprimì 'ravgia e dubi' cun vuschar per il FN. El ha er empermess da 'taisser puspè ils lioms tranter l'Europa e quellas fracziuns da nosa naziun che han vuschà per extremists (...). Jau hai mesirà la ravgia, la tema ed ils dubis d'ina gronda part da la populaziun' (...). Er ils lioms tranter l'Europa, ses pievels e sias burgaisas e burgais vul el taisser puspè (...). Per ina part da la populaziun franzosa munta Macron ina speranza da

renovar la cultura politica, grazia a ses optimissem e sias qualitads persunalas (...). Il pledader da chanceliera federala Angela Merkel ha definì l'elecziun da Macron 'ina victoria per in'Europa ferma ed unida' (...). Jean-Claude Juncker, president da la Cumissiun europeica, è sa declerà 'ventiraivel ch'ils Franzos han tschernì in futur europeic.» La «NZZ» dals 9 da matg commentescha: «Suenter l'elecziun da Macron na sto l'Uniun europeica betg pli batter per survivor, anzi, ella ha survegnì ina vista nova. Po'la profitar da quai? I dependa era dal success da Macron (...) per metter ad ir ina dinamica da refurmas. I regia ina gronda bunaveglia envers el; dentant sto'l'emprim mussar ch'el po refurmar il martgà da lavur, sco empermess, e sminuir il deficit public (...). Quai è ordvart grev» (p. 3). Commembras e commembers da l'Assamblea naziunala vegnan elegids ils 11 e 18 da zercladur.

Il martgà da lavur e las linguas da scola

Schefredatur Arthur Rutishauser commentescha las vistas da Macron are-

guard las refurmas necessarias en il «Tagess-Anzeiger» dals 8 da matg: «Sche la politica dal president na plascha betg a las sanestras fa la metro da Paris chau-ma. Sche la dretga na vul betg collavurar blocheschan camiuns las autostradas. Macron sto surmuntar precis lez mecanissem per vegnir in president efficaci (...). La dischoccupaziun è bler memia auta. La mesadad da la giuventetgna en las periferias n'ha nagina plazza da lavur; bleras famiglias vivan da l'agid social dapi generaziuns. Giuvens isolads vegnan radicals, fan fiu cun ils autos u vegnan terrorists (...). Ins duai crear autentic stimuls per stgaffir plazzas da lavur» (p. 2). Il program da Macron per la scola dat perditga da ses quitads areguard l'educaziun da la giuventetgna. El vul introducir puspè per ils uffants lezias u pensums cun in agid relativ. «Macron propona che las vischnancas sezzas, en collavuraziun cun las scolas, organiseschian activitads da temp liber per uffants, e quai senza squitsch statal. Las scolas secundaras astgassan introducir puspè instrucziun

bilingua ed europeica» (3). Uschia pudess ins promover l'instrucziun da lingua e cultura regiunala, cunzunt en Alsazia e Lorena per il tudestg: «Gia daditg punctuesch'ins da pliras varts l'avantatg da savair tudestg. Quai pon ins sminar cun il dumber da pendularis che lavuran en Germania u Svizra (36 606 e 33 224 il 1999) (...). Oz (2014) cun la situaziun economica datti anc dapli plazzas da lavur» (4). Quai fiss en armonia cun il spiert europeic promovì dal nov president. Era las linguas da l'immigraziun, cunzunt l'arab, meritassan dapli atenziun en l'instrucziun; ma tut quai dependess da las vischnancas.

1. Adressa: La République en marche, 99 rue de l'Abbé-Groult, 75015 Paris.

Pagina-web: en-marche.fr

2. «Der Spiegel», D-20457 Hamburg (Ericusspitze 1, spiegel@spiegel.de), 13 da matg 2017, p. 11.

3. <http://www.cnewsmatin.fr/france/2017-05-07/education-le-programme-demmanuel-macron-752996>

4. Ulrich Ammon, Die Stellung der deutschen Sprache in der Welt. Berlin e Minca (Walter de Gruyter, ISBN 978-3-11-019298-8) 2015, p. 319.